

Guijtz Nani Bacuaa Pabl Lo Rebeñ Roman

Rucuaa Pabl lo rebeñ guidoo nen guedx Roma

¹ Narä, Pabl, nacä te xmos Jesucrist, laani gule narä te gusule'ä xtidx Dios loj rebejn.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprobe'tga. ³ Rediidx ni rusule'ä najc xcuent Jesucrist, Xi'n Dios, ni najc xagdoo to'reii David xcuent tiejxhni. ⁴ Xcuent Xsprit Dxi'an Dad Jesucrist, najcni Xi'npac Dios. Badeed Dios yälrnibee lojni, ni'cni gubañsacni lo rebeñgut. ⁵ Laani gucnäjni narä, guleni narä te gusule'ä xtiidxni te guzobdiajgtu, te chalilajz rebejn ni rej guideb guedxliuj xtiidxni. ⁶ Luxh nadx-aagtu loj rebejn ni guleni te chalilajzreni xtiidxni.

⁷ Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu beñdxan. Gacnäj Dios ni najc Xtdnu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj ruju bejn diidx xcuent xcälrlilajztu. ⁹ Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist. ¹⁰ Sanuutis canabä lojni, top sajc jiädhuiä lojtu si'cni rlazä gunä agujc

xchejli. ¹¹ Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. ¹² Nalajznu, te gustioobnu lajz sa'nu xcälrlilajz xtidx Dios xten sa'nu.

¹³ Rebetzä rlazä gacbeetu balti huält benä xhigab jiädhuiä lojtu, luxh gajd gacdi jiälä. Rlazä jiädhuiä lojtu te chalilajz xhidajlru bejn xtidx Dios sigajcni salilajzreni guiralajt cadro hua'a loj rebejn ni di gac xpen Israel. ¹⁴ Nungäjlpac gusule'ä xtidx Dios loj rebejn nani rnii garen-garen didxsaj, sigajc loj reben griegw, loj renani nayääl, sigajc loj reben najn. ¹⁵ Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcälrnibee xtidx Dios

¹⁶ Sa'csi dina guituiä xcuent xtidx Dios, sa'csi najcni yälrnibee xten Dios te guslaani lo dojl chutis bejn nani rlazj chalilajz xtiidxni, ganidtoo reni najc rexpejn Israel, dxejcti näjza rebejn ni di gac xpen Israel. ¹⁷ Sa'csi xtidx Dios rusule' xho nanab chalilajz te bejn te gacni te beñsa'c nez lo Dios sa'csi huililajzni xtiidxni. Lo xtidx Dios caj scree: “Palga rililajz te bejn xtidx Dios, najcni te beñnaya nez lo Dios, nabaññajni Dios xcälrlilajzni.”

Rextojl bejn

¹⁸ Xcälrdxe'ch Dios nani yu' xhaguibaa sia-jbni yejc rebejn nani gun dojl, nani rlazj gun cosguijdx, nani di gusaan guisieed sabejnreni didxgulii. ¹⁹ Sa'csi anancheereni nani sajc gan bejn xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰ Cheni birixtiejli guedxliuj, recos nani di gacdi fi bejn

xcuent Dios, si'c xcäl_rnibeeni ni najc par tejpas, si'c xtujxh xtenni, huenliisi ruzeñreni sa'csi ruluilojreni recos ni ruzeñ nani benchee Dios. Guiraa reni'c ruluiloj najcni Gueb Dios ni rajp yäl_rnibee par tejpas, ni'c di gacdi guiniireni loj Dios direni niembee xhini'c rla_jz Dios gunreni.

²¹ Ni'cni, mase biembeereni Dios, direni niliä'p xpala'nni te gañreni Gueb Dios, dizareni nudeed xquixtios lojni. Alga gualajz gujcreni, bicäjy xcäriejnreni, naareni hueen najc gunreni si'ctis ni jiajb yejcreni, si'cni rsia' la_jzreni neñ las-tooreni. ²² Caniireni nanduxhreni, per direni gan, nayäälreni. ²³ Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäj.

²⁴ Ni'cni gulälaz Diosreni, basaanni gunreni si'ctis ni rla_jzreni. Bejnreni dojl con resa'reni.

²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbzareni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnä_j niguii, lagajc sagunaareni resnä_jreni.

²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rla_jzreni jiureni Dios,

basaanti Dios suyu' cosguijdx̄tis xcäriejnreni, te chanuutisreni lo xcäl̄latsiajnreni, rujnreni recos ni xhet laadi. ²⁹ Guidxareni dojl̄, näjza cosguijdx̄, näj yäl̄ruguilajz xhixten sa'reni; rugu'treni bejn̄, rujnreni yäl̄rsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniizareni didxxhii. ³⁰ Rniyaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacooob rbäxtiejreni, gualajzreni lo xcuzajnreni, ³¹ nadduxhreni, xheti xcäriejnreni, xhet sajcdi xtiidxreni ni ria'nreni lo sabejn̄reni, direni chanälajz sa'reni si'cni nungäj̄l̄ gacni, dizareni gulaslajz sa'reni. ³² Luxh mase agucebereni gun Dios yäl̄guxhtis lojnreni, najnzareni nungäj̄l̄ guetpac renani rujn recosre, nicla jiureni, rujnreni guiraa recosguijdx̄re, luxh rbaali lajzreni richunäjreni rebejn̄ ni rujnza recosguijdx̄ga.

2

Dios rujn yäl̄guxhtis con didx̄guliipac

¹ Ni'cni, ¿canejz chäätu, la'tu beñguedx̄liuj? Chutis luj ni rgubeelu sabejn̄lu, lagajc si'c cubeezareni luj, lagajc xcuent ni'c sajclu yäl̄guxhtis, sa'csi luj rgubeelu sabejn̄lu, lagajcza luj rujnlu lagajc dojl̄ga. ² Nancheenu sujn Dios yäl̄guxhtissa'c lojn renani rujn sa' dojl̄ga. ³ Beñ guedx̄liuj ni rgubee lojn renani rujn dojl̄, luxh sigajcza rujnlu, ¿la rujnlu xhigab sidedcaj gun Dios yäl̄guxhtis lojlu xcuent xtoj̄llu, ä? ⁴ O ¿la rbälazlu ni rujn Dios, najcni huenduxh, lacti guroob najc xcäl̄rulaslajzni, rapduxhzani pasens? ¿La dilu gan dee najc ni gacnäjl̄lu gusiechlajzlu te

guibicajlu lo dojl, ä? ⁵ Luxh sa'csi nadduxhlu, di lastoolu guigoodz te gusiechlajzlu, cagutajllu yälguxhtis ni gaclu che guidzujn dxej ni gun Dios yälguxhtis loj reben̄ guedxliuj, ⁶ siguijx Dios loj tejgatu xcuent dzuun nani bejn̄ tejgatu. ⁷ Loj rebejn̄ nani rlaiztisreni guibansa'c, ni gusoob xti-idxni, sudeed Dios yälnabajn̄ par tejpas sa'csi gudi-ilreni xhaniduj näjza go'preni xpala'nreni loj Dios, rlaizreni guibajn̄reni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoo-breni reyällatsiaj, redidxguijdx. ⁹ Guiraa reben̄ guedxliuj ni rujn̄ dojl̄ sidejd̄ trabajwduxh näjza sac-huin lastooreni; ganid rexp̄en̄ Israel, dxejcti näjza reben̄ griegw. ¹⁰ Loj guiraa rebejn̄ nani rujn̄ cos-hueen, sudeed Dios xhaniduj, näjza bala'n̄, näjza yälrbecdxi lastooreni, ganid rexp̄en̄ Israel, dxejcti näjza reben̄ griegw.

¹¹ Sa'csi tebloj najc guiraasi rebejn̄ nez loj Dios. ¹² Guiraa rebejn̄ nani bejn̄ dojl̄, luxh direni niem-bee xleii Dios, sinitlojreni sin leiga; guiraa reni biembee xleii Dios, lagajc con leiga sujn̄ Dios yälguxhtisreni xcuent xtojln̄reni. ¹³ Xhet ganaxdi renani rucuadajgtis xleii Moisés najc beñnaya nez loj Dios; rebejn̄ ni rusoobpac rexleii toMoisés, reni'c najc beñnaya loj Dios. ¹⁴ Yu' xhidal bejn̄ ni di gumbee xleii toMoisés, dizareni gac rexp̄en̄ Israel, rujn̄reni recos ni caj lo leii. Najnreni xhini'c najc cos sa'c. Ni'cni lagajc xcäriejn̄reni najc si'c leii par laareni. ¹⁵ Recossa'c ni rujn̄reni ruluiloj nezyusa'c ni yu' lastooreni. Xcäriejn̄reni ruluiloj xhini'c loj guiraa nani rujn̄reni najc cos sa'c, xhini'c najc

dojl. ¹⁶ Guiraa recosre sajc che guidzujn dxej ni gun Dios yälguxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpen Israel näj xleii toMoisés

¹⁷ Luj ni laalu xpen Israel, ni rniilu sanäpaclu xleii toMoisés, rniduxhlu najclu xpen Dios, ¹⁸ rniilu nancheezalu xhini'c rlanj Dios gunlu, anajnzalu xhini'c najc hueenru sa'csi bisiedsa'cpaclu leii. ¹⁹ Rchalolu sajc guluiilu nezyusa'c lo rebejn nani najc si'c lotiä'p, sajc guzanijlu xcäriejn reni nacäy xcäriejnreni. ²⁰ Rchalolu najclu mastr lo renani nayääl, najczalu mastr lo rebiuux, sa'csi nansa'clu leii, luxh lojni caj guiraa yäl'najn näjza guiraa didxguliipac. ²¹ Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlü? ²² Luj nani rniilu na'c guesnäjni te ni di gac chäälni, ¿la resnäjlu nani di gac chäällu, ä? Rdxe'chlu xcuent rebanäjb, ¿xhicuent rbäälü xhicos nen xquidoo rebanäjb, ä? ²³ Luj rlanjlu chä'p xpala'nlu sa'csi najnlü leii, ¿la rusanxtujylu Dios sa'csi dilu gusoob xtidx leii, ä? ²⁴ Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

²⁵ Palga la'tu chutu bee si'cni caj lo leii, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leii, xlia'si guyu'tu bee, sa'csi rujntu dojl. ²⁶ Ni'cni palga te bejn ni di chu beega, luxh rusoobni guiraliipac xtidx leii, ¿la di gacdi guchaagni cuent najcni

si'c te nani yu' beega, ä? ²⁷ Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. ²⁸ Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. ²⁹ Najcpac te xpejn Israel nani najcni nejn lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejn di.

3

¹ ¿Xhini'c sacnäy te bejn najcni te rexpejn Israel, ä? O ¿xhi sajç chuni beega? ² ¡Empac sacduxhni! Ganidtoo, sa'csi loj rexpejn Israel badeed Dios xtiidxni. ³ Mase yu' renani di nililajz diidxga, ¿la ni'cni xhet sajçdi diidx ni bia'n Dios loj rexpejn ni, ä? ⁴ ¡Xho gacni si'c! Diostis najc guliipac, guiralii bejn rusguee. Scree çaj lo xtidx Dios: Lagajç xtiidxlu suluui laaca rujnlu, te che gaclu yälguxhtis, niçla tej xtojllu di guidxäj.

⁵ Palga xcällatsiajnu ruluiiru najc Dios huenduxh, ¿xhini'c guiniinu dxejç? Palga gun Dios yälguxhtis nurnu, dxejç tednu trabajwduxh, ¿la rujnni latsiaj loonu, ä? (Caniä si'c te bejn guedxliuj naj.) ⁶ ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

⁷ Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te beñdojl? ⁸ Yu'za bejn ni canii didx-xhii, najreni

cayäjpnu lo rebejn: “Colyejn cosguijdx te guiluilojni recoshuen.” Per rebejn ni canii si'c sidzujn dxej gacreni yälgu_hxhtis.

Guiraanu najcnu ben_udojl

⁹ ¿Dxejca'? ¿La najcnu ben_huenduxhru lojreni, ä? Dini gac; tebloj abile'cnu yälquij xten rexpen Israel con rebejn ni di gac xpen Israel, sa'csi guiraareni yu'reni lo dojl. ¹⁰ Si'cni caj lo gui_hjtz:

Ruti te be_hsa'c, nicla tejni.

¹¹ Ruti te bejn ni racbee, ruti chu tej nani rguuil Dios.

¹² Guiragajcreni abirii lo xnejz Dios, teblojsi xhet sajcdireni.

Ruti chu tej ni rujn cossa'c, nicla tejni.

¹³ Ro'reni rii ganax didxguijdx, najcni si'c te baa ni naxal, rusingueereni con lujdxreni, didxlatsiaj rii ro'reni najcni si'c bene_hn ni yu' ro' te bäl_hnialajz.

¹⁴ Ro'reni entis cague, entis canii didxrdxe'ch lo sa'reni.

¹⁵ Ni'reni ruxunli saxhe' xtiejn sa'reni.

¹⁶ Cadrotis rijreni rujnreni latsiaj, rutedreni sa'reni trabajw.

¹⁷ Direni gumbee nezyuj ni ruscuedxilajz.

¹⁸ Niclaza guidxelojreni Dios.

¹⁹ Racheenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa reben guedxliuj gacheereni yu' xtoj_hreni nez loj Dios. ²⁰ Sa'csi mase gusoob bejn guira'ti diidx ni caj lo leii, di leiiga gudzucaj xtoj_h

bejn_{ga}, sa'csi leii_{ga} najc nani guluii dojl_{ni} yu' nen_{lastooni}.

Rus_{laa} Dios lo dojl_{xcuent} yäl_rilajz xtiid_{xni}

²¹ Naj ruluii Dios stee mood guibicaj xtoj_lnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtid_x Dios galoo. ²² Stee mood najc scree: Chutis ni chalilajz xtid_x Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. ²³ Sa'csi guiralii rebejn guedxliuj abanijt lo Dios, direni guiga' guidzuj_nreni lo xnezyuj Dios. ²⁴ Niluxh balaslajz Dios nuunu, banidxxlia'ni loonu yäl_naba_nnaya nez loj Dios sa'csi Jesucristis gudijx yäl_guxhtis xten dojl_{che} baxhe'ni xtiej_{nni} lo cruz te badzucajni xtoj_lnu. ²⁵ Baxha_l Dios xi'nni, Jesucrist, te cuajni lo cruz nez loj rebejn te si'c gudijxni guiraa rextoj_l chutis bejn ni rililajz xtid_x Dios xcuent xtiej_n Jesucrist. Si'c bejn Dios te guluiini xho guiba_nnaya bejn lojni. Galoo gojptis Dios pasens rebejn, dini niujn yäl_guxhtis rextoj_lreni, ²⁶ sa'csi acanaj_n Dios guc gunni yäl_guxhtis redojl_{ga}, te si'c guiluini xcäl_nayani nez loj guiraa rebejn, te Diospac gunnaya nez lojni chutis ni rililajz xtid_x Jesucrist.

²⁷ Ni'cni ¿con yäl_naro? ¿Con yäl_bindaan? ¿Xhet sajdini! ¿Xhi leii rudzucaj xtoj_lnu? ¿La leii najc ni rnii jiennu dzunsa'c, ä? ¿Dini gac si'c! Yu' tejtis leii ni rudzucaj dojl_{nani} rnii chalilajztis bejn xtid_x Jesucrist. ²⁸ Dxejc sajc guiniä lojtu chutis bejn

sajc gac naya nez loj Dios sa'csi rililajzni xtidx Jesucrist, xhet sa'csi rujnni redzunsac'c ni caj lo leii.

²⁹ ¿La najc Dios Xtiooztis rexpen Israel, ä? ¿La dini gac näjza Dios xten rebejn ni di gac xpen Israel? ¿Xho dini gac! Najcni Dios xten guiop cuaa bejn. ³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzaren i xtiidxni. ³¹ ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

4

Xcälrlilajz toAbram

¹ ¿Xhini'c sajc guiniinu xcuent toxtadgoldoonu, Abram? ² Paru niajc toAbram bejnaya nez loj Dios por redzuun ni bejn ni, pet sajc guibalazduxhni, per xhet nez lojdi Dios. ³ ¿Xhini'c caj lo xtidx Dios? Caj rediidxre:

Huililajz toAbram xtidx Dios, ni'c bachaag Dios cuent najcni te bejnaya nez lojni.

⁴ Meel nani rca' te bejn ni rujn te dzuun, meelga najc ni riäjl xca'ni, xhet rcaxlia'dinini. ⁵ Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te bejnaya nez loj Dios, sa'csi huililajzni xtiidxni. ⁶ Sigajcza naj toDavid, chicbaa bejn nani ruchaag Dios cuent najcni te bejnaya luxh di niqiiin niujnni redzuun ni caj lo leii. Räjpn i:

⁷ Chicbaa renani abaslaa Dios lo xtojlni, renani abiäuu loj xtojlni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: “ToAbram gujc te bejnaya nez loj Dios sa'csi huililajzni xtidx Dios.” ¹⁰ Guc bidxaag cuent najcni te bejnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹ Dxejcti guyu'ni bee si'c te seen xten yäl'naya sa'csi huililajzni xtidx Dios che gajdlini chu bee te gacni xtad guiraa renani rililajz la ni xhet beedi yu'reni, te näjza laareni guidxaag cuent najcreni bejnaya nez loj Dios, ¹² te gaczani xtad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yäl'rililajz

¹³ Bia'n Dios diidx loj toAbram näjza loj rexagdooni, xca'ni guedxliujre si'c yäl'nasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te bejnaya nez loj Dios sa'csi huililajzni xtidx Dios. ¹⁴ Sa'csi paru renani rusoob xtidx leiiga najc nani xca' yäl'nasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram. ¹⁵ Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlneni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yäl'nasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios. ¹⁷ Si'cza caj lo xtidx Dios, caj rediidxre: “Abenä gaclu xtad xhidal renación.”

Si'c bia'n Dios diidx loj toAbram, Gueb Dios nani gudeed yäl_nabaj_n loj rebengut, nani rnii xcuent recos nani gajd gac ascanu ala najcni.

¹⁸ Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcni xtad xhidajl naciön, te gusojb xtidx Dios ni guniini che räjpni: “Scree gac xhidajl rexag-doolu.” ¹⁹ Di toAbram nunijt xcäl_rirililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu. ²⁰ Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. ²¹ Anajnni rajp Dios yäl_rnibee te gunni guiralii nani bia'n diidx gunni. ²² Ni'c bachaag Dios cuent najcni te be_nnaya nez lojni sa'csi huililajzni xtidx Dios.

²³ Xhet xtebtisdi xcuent toAbram cuaj rediidxre: “Bidxaag cuent najcni te be_nnaya nez loj Dios sa'csi huililajzni xtidx Dios”, ²⁴ näjza xcuentnu cuajni, sa'csi che chalilaaznu xtiidx nani baspa_nsac Xtad Jesucrist loj rebengut, sidxaag cuent najcnu be_nnaya nez loj Dios. ²⁵ Bacuaareni Jesucrist lo cru_jz te gudijxni rextoj_lnu nez loj Dios, luxh guba_nsacni lo rebengut, te gac gacnu be_nnaya nez loj Dios.

5

Xhi rsiajc bejn che najcreni be_nnaya nez loj Dios

¹ Ni'cni che rililajznu xtidx Dios rudzucaj Jesucrist xtoj_lnu rajcnu be_nnaya nez loj Dios, ni'cni ruscuedxini lajznu. ² Sa'csi gujt Jesucrist, sa'csi

gubansacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yalnabajn, su'pacnu lo xcälrdimbicha' Dios. ³ Luxh xhet ni'ctis, sajczu guibalaaznu che tednu trabajw, sa'csi najnnu trabajwga sujn jia'pnu pasens. ⁴ Luxh che rajpnu pasens rajcnu te benguyajlru; che anajczanu benguyajl, rililazsa'crunu. ⁵ Luxh yälrlililazsa'cnu dini gusanxtujy, sa'csi yälsanälajz ni rajp Dios ruchaj lastoonu sa'csi nen lastoonu rbäjz Xsprit Dxan xten Dios ni baniidxni loonu.

⁶ Lal ni xhetliidi sajcdi jiennu lagajc xcuentnu te guibicaj xtojlnu, che basa' dxej biääd Jesucrist te gujtni lo cruzj xcuent rebendojl. ⁷ Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxäjl te bejn ni xcäjb guet lacuaa te bensac. ⁸ Luxh Dios baluiloj xcälrinälajzni xcuent nuurnu sa'csi lal ni yugajcnu lo dojl, gujt Jesucrist lo cruzj xcuentnu. ⁹ Aticaxh naj ni najcnu bejnaya nez loj Dios sa'csi baxhe'ni xtiejnni te gubicaj xtojlnu, naj sidedcaj gacnu xcälguxhtis Dios. ¹⁰ Palga lal ni rdxe'chnu lo Dios, basiäjlni lajzni xcuentnu sa'csi gujt Xi'nni lo cruzj, naj ni abiäjlni lajzni, suslaani nuure lo dojl sa'csi gubansac Xi'nni loj rebengut. ¹¹ Luxh xhet ni'ctis, sibalaznajnu Dios xcuent Dad Jesucrist, sa'csi xcuentni ara'pnu yälrbedxi lajzni nez loj Dios.

Adán con Dad Jesucrist

¹² Ni'cni, xcuent tejtis niguii biu' dojl lo guedxliuj, luxh xcuent dojl biäädza yälgujt, gudejdti yälgujt loj guiraa rebejn, sa'csi guiraa

rebejn bejnreni dojl. ¹³ Cheni gajd xleii toMoisés chu lo guedxliujre, alabejn rebejn dojl, per di niajcdi nucuaquijni rebejn sa'csi xheti leii. ¹⁴ Luxh empac gujt rebejn nen redxej ni gubajn toAdán hasta redxej ni gubajn toMoisés, mase direni niujn lagajc dojl nani bejn toAdán; luxh ruluiloj yu' chu stee bejn nungäjl jiääd.

¹⁵ Luxh nani runidx-xlia' Dios dini gac si'c najc xtojł toAdán. Dini gac si'c sa'csi palga xcuent dojl ni bejn toAdán, gujt xhidalduxh bejn, cuantimaaz naj sunidx-xlia' Dios yälñabajn par tejpas loonu por xcälřulaslajz Dios, nägajc por xcälřulaslajz Dad nani laa Jesucrist. ¹⁶ Luxh nani runidx-xlia' Dios loonu dini gac si'c yälřunijł ni biääd loonu xcuent dojl ni bejn toAdán; sa'csi xcuent tejtis dojlga biääd yälğuxhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej dojl, te xcuent ni bejn Jesucrist sajç gac bejn beñnaya nez loj Dios. ¹⁷ Palga xcuent dojl ni bejn tejsi bejnğa gunibee yälğujł lo guiraa bejn, cuantimaaz lo yälñabajn par tejpas sinibee guiraa reni rca' xcälřulaslajz Jesucrist näjza renani rcaxlia' lojni yälřacnaya nez loj Dios.

¹⁸ Ni'cni sigajc ni biääd yälğuxhtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc beñnaya nez loj Dios, cua'reni yälñabajn par tejpas. ¹⁹ Nalajznu sigajc ni baniłt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajç beñnaya nez loj Dios xcuent tej niguii ni basoob xtiidx Dios.

20 Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcäl'rulaslazduhx Dios, 21 te sigajc ni gunibee dojl guyu' yäl'gujt, sigajcza guinibeeru xcäl'rulaslaz Dios te jia'cnu beñnaya nez loj Dios, te xca'nu yäl'nabajñ par tejpas xcuent Xi'nni, Dad Jesucrist.

6

Agujtnu lo dojl per nabaññajnu Jesucrist

1 ¿Xhini'c guiniinu, ñaj? ¿La sajc guidxunrunu lo dojl te tioobru xcäl'rulaslaz Dios, ä? 2 ¡Gurniälojtu gacni si'c! Nuurnu najcnu si'c te beñgut lo dojl sa'csi rililajznu xtidx Dios; ¿xhoxh gac guibajñrunu lo dojl? 3 ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? 4 Sa'csi che gurobnisnu bigatznäjnuni si'c lo yäl'gujt, te sigajcni huäjs Jesucrist lo yäl'gujt xcuent xcäl'rnibee Dios, sigajcza näj nuurnu sajc guidxunnu lo te yäl'nabañcoob.

5 Sa'csi palga gujcnu tejsi con laani lo xcäl'gujtni che birobnisnu, sigajcza sajcnu tejsi con laani lo yäl'nabañsac lo rebegut. 6 Ni'cni xcärienbiejwnu cuaj lo crujz con laani, te badzucajni rextojñnu, te di gacdiru guinibee dojl loonu. 7 Sa'csi nani agujt, di gacdiru guinibee dojl lojni. 8 Palga nuurnu agujtnu con Jesucrist, rililaaznu sibañsaczanu con laani. 9 Sa'csi nadonpacnu gubañsac Jesucrist loj rebegut, ni'c diruni guet, diru yäl'gujt ga'p yäl'rnibee lojni. 10 Che gujt Jesucrist, gujtni xcuent dojl, luxh diru gacdi guinibee dojl laani par tejpas; ñaj ni gubañsacni, nabajñni nez loj Dios. 11 Ni'cni

la'tu colguchaag cuent najctu si'c te beṅgut lo dojl, luxh nez loj Dios, colguchaag cuent nabaṅṅajtu Jesucrist.

¹² Ni'cni na'c gusaantu guinibee dojl tiejxhtu te guntu si'ctis ni rlaḷz tiejxhtu. ¹³ Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te beṅ nani gubaṅsac lo rebṅgut, nājza colgudeed guideb lagaa tiejxhtu te guntu recoshueen si'c ni rlaḷz Dios guntu. ¹⁴ Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl'rulaslaḷz Dios.

La'tu najc si'c remos

¹⁵ ¿Xho gacni ṅaj? ¿La sajc jienrunu dojl ṅaj ni dirunu chu lo leii sa'csi yu'nu lo xcäl'rulaslaḷz Dios, ä? ¡Xho gacni si'c! ¹⁶ La'tu nansa'ctu palga yu'tu si'c te mos loj te lam te gusobdiajgtu xtiidxni, najpactu xmos beṅ nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu beṅnaya nez loj Dios. ¹⁷ Xquixtios lo Dios, galoo gujctu xmos dojl, per ṅaj guideb lastootu basobdiajgtu xtidx-coob Dios, huililajztu xtiidxni ni basule'nu lojtu. ¹⁸ Luxh agulaatu lo dojl, biädjiajctu xmos Dios lo dzunsa'c. ¹⁹ Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. ṅaj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu beṅnaya nez loj Dios.

20 Sa'csi che gujctu xmos dojl, di rextidx Dios guinibee la'tu. 21 Naja', ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujn loj yälgujttis. 22 Per naj, sa'csi agulaatu lo dojl, abiu'tu najctu xmos Dios, sujntu sajctu bennaya nez loj Dios, luxh xnezyuj recoscoobre rdzujn lo yäl'nabannäj Dios par tejpas. 23 Xcäl'rajx xten dojl najc yälgujt, per nani runidx-xlia' Dios najc xcäl'nabannäj Dios par tejpas xcuent ni bejn Jesucrist xtadnu.

7

Yäl'rului ni rudeed yälguchnaa

1 Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre? 2 Najcni si'c te gunaa nani bachnaa te niguii. Nanabpac cuäznäjni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. 3 Ni'cni, laj ni nabajn chääl gunaaga, palga cuäznäj gunaaga ste'ca niguii, cayujnni dojl sirilajni gunaguijdx. Palga agujt chääl gunaaga, agulaani lo leiiga, sajc guchnaani stee niguii, xhet dojldi cayujnni, dizani guirilaj gunaguijdx.

4 Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruzj, te naj sajc jiu'tu lo ste'ca bejn, loj lagajc Jesucrist nani gubansac loj rebengut te sajc jiennu redzunsac ni rlajz Dios jiennu. 5 Sa'csi laj ni gubajnnu lo yäl'nabanbiejwga, lagajc rediidx nani rnii leiiga di gacdi gun bejn, lagajc recosga rlajz gun tiejxhnu, luxh si'c sozaatisnu lo xnezyuj

yälgujt. ⁶ Naj abiriinu lo leiiga, sa'csi agujtnu lo leiiga nani gunibee loonu galoo. Naj con xprit-coob ni yu' neñ lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

Redojl nani yu' tiexhä

⁷ ¿Xhixhni'c guiniinu naj? ¿La dojl najc leii, ä? ¡Xho gacni si'c! Palga dina niembeä xhi caj lo leiiga, dizana niacheä cayunä dojl. Dina niacheä cayunä dojl che rlazä xca'a xhixten ste'ca bejn palga dina niolä lo leii rediidxre: “Na'c chuguij lajzlu rehxixten bejn.” ⁸ Ni'cni lagajc diidx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leii, xhetiza dojl, agujtni. ⁹ Galoo gubanä xhet leiidi nanä, luxh che biääd diidx ni rnibee leii, gucebeä xhini'c najc dojl, dxejc banitä lo Dios, si'c ni gutä. ¹⁰ Luxh baxhal Dios leiiga loonu te jiuäni, te xca'ä yäl nabajñ, luxh alga bazenni benä dojl, banitä nez loj Dios, gutäti dxejc. ¹¹ Con leiiga, basguee dojl narä, bejn ni narä si'c te beñgut nez loj Dios.

¹² Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. ¹³ ¿Dxejca'? ¿La nani najc te coshween huinä narä lo yälgujt, ä? ¡Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshween, te lagajc rediidx ni caj lo leiiga jienloj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl.

¹⁵ Sa'csi dina gacheä xhini'c runä. Dina gunä recos

nani rlazä gunä, alga cayunä latsiaj nani dipacna rlazä gunä. ¹⁶ Naj palga narä runä latsiaj nani dipacna rlazä gunä, lagajcza ni'c rului hueenca najc leii. ¹⁷ Naj, diruni gac narä ni cayujn latsiaj, sa'csi yu' dojl nen lastoä, ni'c ni cayujn runä latsiaj. ¹⁸ Sa'csi narä nanä nen lastoä, nalajznu lo tiexhä, xhetliidi cossa'c di yu'; sa'csi rlazä gunä cossa'c, per dina gacdipä te gunäpac recossa'cga. ¹⁹ Sa'csi dina gunä redzunsac nani rlazä gunä, alga latsiaj nani diru rlazä gunä, ni'c runä. ²⁰ Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

²¹ Ni'cni narä, nani rlazä gunä redzunsac, rdxälä leiire: yu'pa dojl tiexhä. ²² Sa'csi nen lastoä, rlazäpac gusobä diidx xten xleii Dios. ²³ Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, rutedzani narä ladzṅaa xleii dojl nani yu' guideb lagaa tiexhä.

²⁴ ;Proobza narä! ¿Chuni'c gusḷaa tiexhä ni nungäjl guet xcuent dojl? ²⁵ ;Xquixtios loj Dios sa'csi Dad Jesucrist sajc gusḷaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl, chuni lo xleii dojl.

8

Yälṅabajṅ ni najc xcuent Sprit Dxaṅ xten Dios

¹ Ni'cni ṅaj rut rajc di rbe'c xcälquij renani ahuililajz xtiidx Jesucrist, renani diru jiu gunreni

latsiaj ni rla²z gun tiejxh¹reni, alga riurureni rujn-
reni ni rnibee Sprit Dxan xten Dios ni rbä¹z ne¹
lastooreni. ² Sa'csi leii xten Sprit Dxan xten Dios ni
rudeed yäl¹nabaj¹n xcuent Jesucrist, abaslaani narä
lo yäl¹rnibee xten xleii dojl nä¹za yäl¹gujt. ³ Sa'csi nani
di niajcdi niujn leibiejw, sa'csi dini niajc nadip lo
rebenguedxliuj te gacreni be¹nnaya nez loj Dios, ni'c
bejn Dios che baxha¹ni Xi'nni Jesucrist, si'c te be¹
guedxliujre xcuent dojl, te bejn¹ni yäl¹guxhtis lo dojl
ni rnibee tiejxh bejn. ⁴ Te si'c gac xcäl¹guxhtis xten
leibiejw lo tiejxh nuurnu, renani dirunu gusoob
nani rla²z gun tiejxhnu, sa'csi naj rbaj¹nu si'c ni
rnibee Sprit Dxan xten Dios ni yu' ne¹ lastoonu.

⁵ Sa'csi renani rusoo¹b¹tis nani rla²z gun
tiejxh¹reni, rujntisreni xhigab xcuent redojlga,
luxh renani rusoo¹b xtidx Sprit Dxan xten Dios
rujntisreni xhigab xcuent nani rla²z Dios gunreni.
⁶ Sa'csi renani yu'tis yejcreni nani rla²z gun
tiejxh¹reni, sejtreni, sinijtreni; luxh renani yu'tis
yejcreni nani rnii Sprit Dxan Dios, reni'c sibe¹cdxi
lajzreni, sica'reni yäl¹nabaj¹n lo Dios par tejpas. ⁷ Te
xcäriejn nani riutis ni rla²z gun tiejxh bejn rdxe'ch
Dios lojni sa'csi dini gusoob xleii Dios, luxh nicla
gac gunnini. ⁸ Renani nabaj¹ntis te gunreni latsiaj
ni rla²z gun tiejxh¹reni di Dios guibalaznä¹jtreni.

⁹ Luxh la'tu dirutu gun si'ctis ni rla²z gun tiejx-
htu, ni'cni rujntu si'c ni rla²z Sprit Dxan xten Dios
guntu, palga rbä¹z¹ni ne¹ lastootu. Palga yu' chu
tejtu ni di Sprit Dxan cuääz ne¹ lastooni, di ni'c gac
xpej¹ni. ¹⁰ Palga rbä¹z Jesucrist ne¹ lastootu, agujt
tiejxhtu xcuent dojl, xprittu nabaj¹n sa'csi anajctu
be¹nnaya nez loj Dios. ¹¹ Luxh palga ne¹ lastootu

rbäjz Sprit xten nani baspañsac Jesucrist loj rebeñgut, lagajc nani baspañsac Jesucrist lo rebeñgut suspañsac tiexhnu ni nabajñ lo guedxliujre xcuent Xpřitni nani yu' neñ lastoonu.

¹² Ni'cni rebetzä, najcnu bejñ ni cuaj di'n, xhet lojdi tiexhnu te jiennu si'c ni rlanj gun tiexhnu.

¹³ Sa'csi palga cayujntu si'c ni rlanjtis gun tiejxhtu, sejtpactu. Palga nabajñtu xcuent Sprit Dxi xten Dios ni rbäjz neñ lastootu, sibälaztu latsiaj ni rlanj gun tiejxhtu, sibaññäjtü Dios par tejpas.

¹⁴ Sa'csi guiraa renani rulüi Sprit Dxi xten Dios guiraa reni'c najc rexi'n Dios. ¹⁵ Naj ditu nica' te sprit xten te mos te chusactu lo yälrdxejb, alga cua'tu sprit xten ni najc si'c te bisiäjb ni cua' bejñ si'c xi'npacni, naj najcnu xi'nni, ni'cni sajc gäbnu lojni: “Guejblu, Xtadä.” ¹⁶ Sa'csi lagajc Sprit Dxi xten Dios rulüi loj xpřitnu, najcpacnu xi'n Dios.

¹⁷ Luxh palga najcnu rexi'nni, sica'zanu yälñasa'c lo Dios, tejsi yälñasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejdu neñ redxejre, digacdi gun tebloonureni con yälrdimbicha' nani churu guihuiinu. ¹⁹ Sa'csi guiraa recos nani benchee Dios lo guedxliujre, cabäjzreni, yuduxhreni gaan fiireni dxej che gululoj Dios chuni'c najc rexi'nni. ²⁰ Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlanjdi recosga, per sa'csi si'c bejñ Dios, ni cabäjztis ²¹ guslaapacni guiraa recos ni bencheeni lo guedxliujre lo xcälñribee yälgujt, yälñnitloj, te dxejc sajc jiu'ni lo yälñbedxi xten xcälrdimbicha' xten rexi'n

Dios. ²² Guiraa recos ni gulecxtiej Dios lo guedxliujre entis roonreni, guira dxej rdejdreni trabajw, si'c rdejd te gunaa trabajw che rajl xi'nni. ²³ Luxh xhet nani tre'tis lo guedxliujdi, näjza nuunu ni yu' Sprit Dxi xten Dios nen lastoonu, roonzanu cabääznu dxej cheni xca' Dios nuure si'c rexi'nni, cheni guscoobzani tiexhnu. ²⁴ Sa'csi xcälirililaaznu ni rbääznu, ni'c bejn gulaanu luxh yälrbäjz ni guyasi rien, di ni'c gac yälrbäjz, sa'csi ¿chu laa ni cuääz xcuent te cos ni ala bahuiini? ²⁵ Palga cabääznu xcuent te cos ni gajdnu guihuii, rbaali laaznu, rsiudzu'tznu rbäjznu guihuiinu gacni.

²⁶ Sigajcza racnäj Sprit Dxi xten Dios nuure cadre xheti yälrutijp laaznu sa'csi nicla guidonnu xho mood riäjĵ guiniab bejn lo Dios. Luxh lagajc Sprit Dxi ni yu' lastoonu rniabni lo Dios xcuent nuure con yälrbedxnen nani nicla gajd bejn gäb con diidx xho najcni. ²⁷ Dios, nani rula'tz lastoonu, nanchee xhini'c rniab Sprit Dxi xtenni xcuent nuurnu, sa'csi rniabni si'cpac ni rlajz Dios guiniabnu xcuent rexpejn pac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzuunni rsiajcrenini te gun Dios gac recosga par xcäl'nasa'creni. ²⁹ Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. ³⁰ Renani guleni galooli, reni'c gurejdxni; renani gurejdxni, bejnzani najcreni bejnaya nez loj

Dios; renani bejn̄ni najczeni bejn̄naya nez loj Dios, gulä'pzani xpala'nreni.

³¹ ¿Xhixhni'c guiniinu xcuent dee? Palga yu' Dios xlaadnu, ¿chuxh ni'c najc ni gun gaan loonu? ³² Dios nani di nudxojn Xi'nni, nani cuäjb cuaj Xi'nni lo cruzj te gujtni, te gudijxni xcuent xtojlnu, ¿xho dini guniidx loonu xcuent Xi'nni guira'ti nani rquiinnu, ä? ³³ ¿Chuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rnii najcnu bejn̄naya nez lojni. ³⁴ ¿Chuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xlad-bee Dios cadre rnibeeni; laazani cabejdx canabni lo Dios xcuentnu. ³⁵ ¿Chuni'c sajc gudzucaj nuurnu lo yäl̄sanälajz xten Jesucrist: trabajw, o yäl̄xliajs, o yäl̄rusacsí, o yäl̄rliiaan, o yäl̄xhabääl, o yäl̄rdxejb, o te spaad, ä? Nicla tejni. ³⁶ Si'c ni caj lo guijt ni caj xtidx Dios:

Xcuentlu, sa'csi najcnu xpejn̄lu caye'tnu guixeguixee.

Ruchaagreni cuent najcnu si'c xiil ni aguro' te ju't bejn̄ni.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure.

³⁸ Sa'csi anancheä nicla yäl̄gujt, niclza yäl̄nabajn̄, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl̄milaagwr, ³⁹ nicla jiaroduxh, niclaza jiäjt pac, niclaza xhitis cos ni guc-chee, nicla tej redee di gacdi gudzucaj nuurnu lo xcäl̄sanälajz Dios, yäl̄sanälajz ni rajpza Dad, Jesucrist.

9

Dios agule reben Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxaan xten Dios caguluii xcärienä laaca rniä; ² cayac-huinduxh lastoä, sanuutis yälxliajsga. ³ Sa'csi narä rlazä malaii sajc lagajc narä nitloä lo Dios te sajc gacnää resa'ä lo guedxliujre, rexpejn Israel. ⁴ Sa'csi laareni najc xagdoo toIsrael, luxh laareni nungäj| gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen guidoo. Sica'reni reyäl'nasa'c xten Dios palga jiureni xtiidxni. ⁵ Laareni najc rexagdoo xten toxtadgooloonu ni gubajn agujc xhero. Jesucrist gujca xagdoo xten toIsrael che gojni si'c te bejn guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejn pac Israel.

⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexag-dodoolu nani guigab najc reni gac xagdoo Isaac.”

⁸ Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. ⁹ Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chääl'ni, toxtadgoolnu Isaac. ¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac

xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: “Xingangaloolu gac xmos xinhuinlu.” ¹³ Si'cza caj lo guijtz rediidxre: “Sanälazä Jacoob, niluxh bidxechaää Esaú.”

¹⁴ ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! ¹⁵ Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnäã chutis bejn nani rlazä gacnäã.” ¹⁶ Ni'cni dini gac xcuent ni rlazj rebejn gac, dizani gac xcuent nani rujn rebejn. Rajctisni si'c rlazj Dios nani rulaslazj bejn. ¹⁷ Ni'cni caj lo guijtz xten Dios che gunii Dios xcuent Faraón: “Narä benä gujclu rei xten Egipto te guluiloj xcälrnibeä, te guiliä'p bejn xpala'nä guideb guedxliujre.” ¹⁸ Rulaslazjni rebejn nani rlazjctisni, runnadipzani lastoo bejn nani rlazjctisni.

¹⁹ Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlazjni gac, ä?” ²⁰ ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?” ²¹ Gurniälojlu. Bejn nani runchee guejs, ¿la di gacdi gunni si'ctisni rlazjni con bajnga, ä? ¿La di gacdi guncheeni te guesa'c nägajcza te guesyuj ni xhet sirbdi con lagajc bajnga?

²² ¿Xhiru najc, palga Dios rlazjni guluilojni xho rujjni yälguxhtis, näjza rlazjni guluilojni xcälrnibeeni, gopnäjni pasens renani nungäjlgac yälguxhtis, te nitlojzareni, ä? ²³ Bejn ni si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni.

24 Lagajc nuurnu najcnu reni aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu. 25 Cajza lo guijtzi ni bacuaa Oseas:

Renani di gac xpenä, reni'c cuälää “xpenä”.

Luxh nani dina ninälazä, sinälazäni.

26 Dxejcti lagajc cadre räjpreni lojreni:

“Ditu gac rexpenä”,

lagajc ro'c säjpreni lojreni:

“La'tu najctu xi'n Dios ni nabajn par tejpas.”

27 Cajza lo guijtzi ni bacuaa Isaías: “Mase najc xhidajl rexpen Israel si'c najc yujxh ni tre' ro' nisdoo, guxii gac reni laa lo dojl. 28 Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojbza gunnini.” 29 Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoo reben tiemp,

najcnu si'c gujc Sodoma näjza Gomorra, reguejdx ni gunitloj.

Xtidx Dios näj rexpen Israel

30 ¿Xhini'c sajc guiniinu naj? Rebejn nani di gac xpen Israel, direni niguiil xho gacreni bejnaya nez loj Dios, niluxh agujcreni bejnaya nez loj Dios sa'csi huililajzreni xtidx Jesucrist. 31 Luxh rexpen Israel, mase sanuutisreni lo xleii Moisés ni ruluii xho gac bejn bejnaya nez loj Dios, banijtreni, direni niujn gaan nusoobreni guideb leiiga.

32 ¿Xhicuent gujcnä si'c? Sa'csi direni nililajz xtidx Dios, alga rlajzreni guntisreni dzuun xten leii, naareni si'c gacreni bejnaya nez lo Dios. Ni'cni gulaj ni'reni lo guij ni rutienta' bejn, nalajznu

direni nililajz xtidx Dios xcuent Jesucrist. ³³ Si' cza bacuaa Isaías, räjpni:
 Aguleä te bejn lo guedx Siön ni gac si'c te guij cadro
 rtiäjł ni' bejn,
 te guij ni rusälta' bejn.
 Chutis tej nani chalilajz xtiidxni, dini jianxtujy.

10

¹ Rebetzä, rlazduxhä chalilajz rexpenä xtidx Dios. Rniabduxhä lo Dios te guslaanireni lo xtojłreni. ² Narä rniäpac nancheä ruzuxhijb rexpen Israel lo Dios, niluxh direni gumbesa'c xhini'c rłajz Dios gunreni. ³ Sa'csi direni niacbee xcuent xho rajc te bejn te bejnaya nez loj Dios, ni'c rłajzreni gunreni dzuun si'c ni caj lo leii te gacreni bejnaya nez loj Dios, ni'cza direni nusoob xtidx Dios te gacreni bejnaya nez lojni. ⁴ Abasoob Jesucrist xtidx Leii, ni'cni che chalilajz bejn xtidx Jesucrist, anajczeni bejnaya nez loj Dios.

⁵ ToMoisés bacuaa rediidxre: “Chutis ni rłajz gac bejnaya nez loj Dios sa'csi rusoobni xtidx leii, nanab gusobsa'cpacni diidxga guideb nabajłni lo guedxliujre.” ⁶ Xcälñayareni nez loj Dios sa'csi rililajzreni xtidx Jesucrist, rnii scree: “Na'c guiniitu neñ lastootu, ¿chuni'c chä'p xhaguibaa?” nalajznu, te jiadnäsacni Jesucrist loj guedxliuj. ⁷ Na'cza gäbni: “¿Chuni'c jläjt gabijł?” (nalajznu te chaxiini Jesucrist loj rebęgut). ⁸ ¿Xhini'c rniini naj? Rniini: “Diidxga suga' gajxh ro'tu, neñ lastootu.” Nalajznu, diidx xcuent yälřililaaz nani cagusule'nu lojtu. ⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebęgut, suslaani la'tu lo dojł.

¹⁰ Sa'csi con lastooni rililajz biniet xtiidxni, ni'c rajcni beñnaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

¹¹ Sa'csi rnii xtidx Dios scree: “Chutis ni rililajz xtidx Dad Jesucrist, dini jianxtujy.” ¹² Sa'csi guiraa rebejn najc tebloj nez lojni, rexpejn Israel sigajc rebenzajt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. ¹³ Lo xtidx Dios caj rediidxre: “Chutis ni rbedx-rniab lo Dad, siliaani lo xtojlni palga rililajzni xtidx Dios.” ¹⁴ ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? ¹⁵ Luxh ¿xhoza gusule'reni diidxga palga rut guxhaldireni? Si'cni caj lo guijtz: “Chipza saru najc ni' renani riädnä diidx xcuent cossa'c, yälrbecdxi lajz rebejn.”

¹⁶ Xhet guiraadireni rusoob xtiidxni, sa'csi gu-niiza toIsaías: “Dad, ¿chuni'c chalilajz xtiidxnu?” ¹⁷ Rililajz bejn xtidx Dios che rucua diajgreni di-idxga; rucua diajgzareni che yu' chu rusule' xtidx Jesucrist.

¹⁸ Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,
abidzujnza rextiidxreni lo guiraa reguejdx ni tre'
lo guedxliujre.

¹⁹ Rniäza: Dipac rexpen Israel niacbee, o ¿la gucheereni, ä? Galooli gunii toMoisés rediidxre:

Sunä gudxo_jntu xcu_ent rebe_jn ni di gac te guejdx,
con te guejdx nani di gacbee suche'chä la'tu.

²⁰ Diza toIsaías nidxejb guniini rediidxre:

Renani di niguuil narä, bidxäjl narä,
baluiloäza loj renani di niniabdiidx narä.

²¹ Guniiza toIsaías xcu_ent rexpen Israel:

Desde galooli, dxej-yääl basgää naä lo rebe_jnga te
niureni xtidxä,

luxh najcreni be_jn ni di gusoob diidx, rutzu'reni
didxnaj.

11

Rexpen Israel nani gulaa lo dojl

¹ Arniä: ¿La agulälaz Dios rexpen Israel, ä? ¡Xho gacni si'c! Ni lagajc narä nacä te xpen Israel, te xagdo_o toAbram, nadxagä lo resa' toBenjamín.

² Di Dios nibälaz rexpej_nni, xpen Israel nani guleni galooli che gajdli guirixtiej guedxliuj. O

¿la dilu gacbee xhi caj lo xtidx Dios cadre rni xcu_ent Elías, xho gunabduxh Elías didxnaj lo Dios

xcu_ent rexpen Israel, ä? Räj_pni scree: ³ “Dad, abagu'treni guiraa reniguii nani gunii xtiidxlu,

abatzu_jlreni rexquidoolu, xtebtis narä bia'nä, luxh naj r_lajzreni ju'treni narä.” ⁴ Luxh, ¿xhini'c räj_p

Dios lojni? Räj_pni: “Abalu_cheä gajdz mi_l be_jn nani gajd guzuxhijb nez loj Baal.” ⁵ Si'cza naj,

abia'n te chinae' rexpen Israel nani agule Dios xcu_ent xcäl_rulaslajzni. ⁶ Dxejc palga ruslaani nuure

lo dojl xcu_ent xcäl_rulaslajzni diruni gac sa'csi yu' xhi dzuun biennu te nuslaani nuure lo dojl. Paru

si'c najcni diru xcäl_rulaslajz Dios gac yäl_rulaslajz.

⁷ ¿Dxejca'? Di rexpən Israel nidxäl nani cagui-ilreni, luxh rebejn nani agule Dios, ni'c bidxälni, luxh ste cuaareni, aguyalajzreni. ⁸ Gujcnı si'c caj lo xtidx Dios:

Bascäy Dios xcäriejnreni, näjza balojni di jien, lo dxe najli di diajgreni jiejn.

⁹ Guniiza toDavid, scree caj lo xtidx Dios:

Sugun xmex lanijreni jiajbreni,

te gac guiga'reni,

sugacni si'c guij ni rulani' bejn, te gacreni yälguxhtis.

¹⁰ Suguscäy Dios balojreni te na'c fisa'creni, sujie't dejtzenı, sutedrenı trabajwduxh par tejpas.

Yälrusläa lo dojl xten bejn ni di gac xpen Israel

¹¹ Naj rniabdixä: ¿La biajb rexpən Israel te gunitrenı par tejpas, ä? ¡Xho gacni si'c! Sa'csi biajb rexpejn Israel, ni'cni gojl biäd yälrusläa lo dojl lo bejn ni di gac xpen Israel, te si'c guisiäblajz lajz rexpən Israel laareni lo dojl. ¹² Palga xcuent dojl ni bejn xpen Israel gojp reben guedxliuj xcälnasa'c Dios, palga xcuent yälrunitj xten rexpən Israel guyu' xcälnasa'c Dios par rebejn ni di gac xpen Israel, aticaxh chu xcälnasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä, ¹⁴ te don xho gunä te guisiäblajz reben ladxä ni najc xpen Israel, te si'c chalilajzrenı xtidx Jesucrist. ¹⁵ Palga gulecdxireni lajz reben guedxliuj con Dios sa'csi gulälaz rexpən Israel xtidx Jesucrist, aticaxh che chalilajz rexpən Israel rextidx Jesucrist, sibaṅsac renani najc si'c

ben_gut. ¹⁶ Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷ Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibaj_nni con xtiejn yajg oliibga.

¹⁸ Ni'cni, na'c gactu gualajz lo re_naapac yajgga. Col_gusnaj lajz_tu, xhet la'ditu ni ruede_d yäl_nabaj_n lo xlobaa yajgga, lobaaga ni runiidx yäl_nabaj_n lojtu.

¹⁹ Dxejc col_guinii: “Batiuugreni naapac yajgre, te gujc biguidä cuä' yajgga.” ²⁰ Guliipacni, biru' naapac yajgga sa'csi direni nililajz xtid_x Dios luxh la'tu biguiid_tu cuä' yajgga sa'csi huililajz_tu xti-idxni. Na'c gactu gualajz, col_guidx_ejb, ²¹ sa'csi palga di Dios nutedbia re_naa yajgga, diza Dios gutedbia la'tu. ²² Bahuii j_lacti hueen najc Dios! Luxh lacti niälajz_zani; con renani banij_t najcni niälajz, luxh lacti rulaslajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios. ²³ Luxh sigajcza reni bidin, palga di chanuu cuälazreni xtiidxni saj_c suquidsac Diosreni lo yajgga. ²⁴ Luxh la'tu najctu ben_zij_t, najctu si'c naa te yagoliib ni xtebca gulejn nen_n dajn. Luxh batiuugni la'tu te baquiidni la'tu lo te yagoliib ni najc yagsa'c ni readuxh oliib lojni, mase xhet si'cti najc olibguijxhga, jaticaxh rexpen Israel ni banij_t najc si'c naapac xten yagolibsa'cga ni bidin, palga chalilajzpacreni xtid_x Dios, suquidsac Diosreni loj yajg ni najc xtenpacreni!

Che laapac rexpen Israel lo dojl

²⁵ Rebetzä, rlazä gacbeetu xcuent te diidx najn, te di naatu nanduxhtu. Dee najc didx najgajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios. ²⁶ Dxejcti siliaapac guiraa rexpem Israel lo dojl che chalilajzreni xtidx Dios, sa'csi si'c caj lo xtidx Dios, cadro caj redixre:

Nani ruslaa sajc beņ guedx Sión,
luxh sudzucajni xtojļ renani najc xagdoō toJacoob.

²⁷ Dee najc diidx ni bia'nä con laareni,
che gudzucaä xtojļreni.

²⁸ Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. ²⁹ Sa'csi rut rajcdi rudzucaj nicla yälñasa'c ni rudeed Dios, niclaza yälrbejdix xten Dios. ³⁰ La'tu galoo ditu nusoob xitdx Dios. Naj rulaslajz Dios la'tu sa'csi gulälaz rexpem Israel xtiidxni. ³¹ Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslajzzani la'tu. ³² Dios basaan biajb guiraanu lo dojl, te si'c sajc gulaslajz Dios guiraanu.

³³ ¡Lacti guroob najc yälñasa'c xten xcälñajn, xcälracbee xten Dios! Nicla tej bejn guedxliuj di gacbee guiraa rexcälğuxhtisni, rudliidiza najn rexnezyujni. ³⁴ Si'c caj lo guiitz: “¿Chuni'c gucbee xcäriejn Dios? ¿Chuni'cza abaluiini? Rutliidi. ³⁵ O ¿chuni'c badedxgaa te xhi cos lojni, te quixsacnini lojni, ä? Rutliidi.” ³⁶ Sa'csi loj Dios siääd guira'ti,

luxh laani bencheeni guira'ti par lagajcza laani. Suguiliä'pnu xpala'nni par tejpas. Sugacni si'c.

12

Yäl̄nabaj̄n rliä'p xpala'n Dios

¹ Ni'cni rulidxä la'tu rebetzä, sa'csi rulaslajz Dios nuure, colgudeed xcäl̄nabaj̄ntu lo Dios te gac guibaṅsa'ctu si'cni rlanj Dios. Dee najc yäl̄raj̄npac Dios si'c ni nungäjl̄ gant̄u Dios. ² Na'c rujntu lagajc xhigab ni rujn reben̄ guedxliuj, col̄guscoob rexhigabtu te guidxaapac xmoodtu te si'c guluii Dios xhini'c rlanjni guntu, nalajznu xhini'c najc hueen, xhini'c rdxagljajz Dios, xhini'cza najc laapac.

³ Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Col̄yejn̄ xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. ⁴ Sa'csi sigajc najc tiejxhnu, yu' xhidal la'ni, luxh tejgareni rujn xtzuun-xtzuunreni, ⁵ sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

⁶ Luxh sa'csi tejganu rajpnu garen-garen dzuun xcuent yäl̄rulaslajz ni baniidx Dios loonu, sujiennu rextzuunnu screeza: nani rajc rnii xtidx Jesucrist, suguniinini, si'c ni najc xcäl̄rililajzni; ⁷ nani rajc racnäjä sa'ni, sugacnäjäni; nani rajc ruluii xtidx Dios, suguluiini; ⁸ nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo

sa'ni, suguinibeeni con yäl̄nadolajz; nani rajc ru-las-lajz resa'ni, sugulas-lajzni con yäl̄rbalajz.

Xho nanab guiba_{nnu} lo xnezyuj Dios

⁹ Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac. ¹⁰ Colchanälajz resa'tu si'c rinälajz bejn rebejtzn̄i. Colguiliä'p xpala'nreni.

¹¹ Colyejn dzunsac, na'c cuedxitu. Colyejn xtzuun Jesucrist con guideb xtijptu, guideb xcäriejntu.

¹² Colguibalajz sa'csi ahuililajztu xtiidxni. Colcuedxi lajztu che tedtu trabajw. Colcuedx-colnabtis lo Dios guideb nabajntu.

¹³ Colgacnäj rebejn nani rililajz xtidx Dios; sacru colnii loj ni riädhuiitu.

¹⁴ Colguinii didxsa'c xcuent renani rusacsí la'tu, na'c gudzubdetureni.

¹⁵ Colguibalaznäj renani rbalajz, colyonnäj renani roon.

¹⁶ Colyejn tejtis xhigab con resa'tu, na'c gactu gualajz, colguchaag loj reben̄ nadolajz. Na'c guchalotu najctu be_{nn}anduxh.

¹⁷ Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn. ¹⁸ Cadrotis sajcn̄i, dxitis colguiba_{nn}äj guiraa rebejn. ¹⁹ Rebetzä, na'c guntu xhigab lagajc la'tu gudeedu xten renani rujn dojl̄ lojtu, sa'csi lagajc Dios gun yäl̄guxhtis lojreni, ni'cni caj lo xquijtzni scree: “Narä gunä yäl̄guxhtis, narä quixä lojreni si'c naj Dad, Dios.” ²⁰ Näjza: “Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni.” ²¹ Na'c

gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13

¹ Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxliujre, lagajc Dios gule'creni. ² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni. ³ Renani rnibee di guchejb renani riu xtiidxreni, ruhejbreni renani najc beñ guijdx ni di jiu xtiidxreni. Palga di rlajztu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c. ⁴ Reguxhtis rujnreni lojtu xtzuum Dios te guibaṅsa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuum Dios te gunreni yälguxhtis, te quixpac renani rujn dojl. ⁵ Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnsa'c, te xcäriennaya. ⁶ Ni'cni colquijx lojreni nani riäjl xca'reni sa'csi renani rnibee najc xmos Dios, luxh ni'cpac najc xtzuumreni.

⁷ Colgudeed lo guiraa bejn nani riäjl xca'reni. Colquiiix loj renani nazääbtu; colquijx impuest loj ni riäjl xca'ni; colchanälajz renani riäjl chanälajztu; colguiliä'p xpala'n renani riäjl chä'p xpala'reni. ⁸ Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisinni, bejnga abasoob xleii Dios. ⁹ Sa'csi lo xleii Dios caj scree: “Na'c guesnäjlu bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu

xhixten resa'lu.” Luxh palga yu' xhi stee leii rsa'ni con leii ni rnii: “Chanälajzlu resa'lu si'c sanälajzlu lagajc luj.” ¹⁰ Nani rajp yäl_sanälajz, dini gun latsiaj lo resa'ni. Ni'cni yäl_sanälajz rusooob releii ni caj lo xtidx Dios.

¹¹ Colyejn guiraa redee, sa'csi anajntu xho najc redxej ni nabaj_nnu naj, anajntu alagojl or guibaj_nnu lo bacal sa'csi abidzungejxhru dxej che laanu nen dojl lo dxej che huililajznu.

¹² Aguxhi_nduxh, asiädgajxh bianij. Ni'cni cuääz jiennu redzuun guidx ni rajc lo xcäy, te jientisnu redzunsac ni rajc rdxee, lo bianij. ¹³ Guibansa'cnu si'c riäj_l guibaj_n rebejn rdxee, na'c guiban_nnu lo yäl_rä', niclaza lo yäl_biey, na'c guidiesnäjn_nu bejn ni di gac chäälnu, na'c ga'pnu rebis, na'c guidxagdi_lnu resa'nu, na'c chuguij lajznu xhixten resa'nu. ¹⁴ Ni'cni col_ca' xcäl_rnibee Jesucrist te na'c guntu redojl ni r_lajz gun tiejxhtu.

14

Na'c guiniyajtu rebejztu

¹ Col_nii didxdoo lo rebejn nani di gumbesa'c xtidx Dios, na'c til_näjt_reni. ² Sa'csi yu' reni rililajz nani saj_c gaureni guira'ti xhi cos, niluxh nani gajd sutijp lo yäl_rrililajz, ganaxtis berduur rajwni. ³ Nani rajw guira'ti, na'c guidxechnäj_ni nani di gau guira'ti; luxh nani di gau guira'ti, na'cza guiniyaj_ni nani rajw sa'csi Dios aguleza bejn_ga. ⁴ ¿Chuxh luj te guiniyajlu lo xmos te bejn, ä? Sugäb lagajc xlam_ni lojni la laaca ruj_nni o la xhet laadi ruj_nni. Luxh suj_nni laaca sa'csi Dad Jesucrist suj_n sutijp lastooni.

⁵ Tej bejn naa sajcrú tej dxej lo stee dxej, dxejc ste'ca bejn rchalo guiraa redxej najc tebloj. Xhet najcđi, tejga bejn sugunpac lagajc xhigabni. ⁶ Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajn xcuentcanu, nicla tejzanu dinu guet xcuentcanu. ⁸ Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, laltis najcnu rexpen Dad, Jesucrist. ⁹ Ni'cni gujt Jesucrist, ni'cni gubañsaczani, te sajc gacni Dad xten rebeñgut, näjza Dad xten rebejn nani nabajn.

¹⁰ Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. ¹¹ Sa'csi scree caj lo xtidx Dios: Si'ctis ni nabañä, rniliäpac lojtu, räjp Dad Dios, guiraa reben guedxliuj suzuxhijbreni loä, luxh guiragajc ro'reni sicäjp narä nacä Dad Dios.

¹² Ni'cni guiraanu, tejganu sudeednu cuent loj Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen jiennu xhigab neñ lastoonu xhetliidi jiennu ni gun jiajb resa'nu lo dojl. ¹⁴ Narä nanä, racbeäpac guira'ti najc hueen. Jesucrist Xtdnu baluii narä si'c. Luxh palga yu' chu tej ni rchalo dini gac

hueen, par laatisni dini gac hueen. ¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. ¹⁶ Ni'cni na'c gusaanlu guiniyajreni nani najc te cos hueen par luj. ¹⁷ Sa'csi xcälrnibee Dios dini gac xcuent yälrajw, niclaza xcuent yälrä'; xcälrnibee Dios najc xcuent te yäl'nabañnya nez loj Dios, näjza yälrbedxilajz con yälrbalajz xcuent Sprit Dxañ xten Dios. ¹⁸ Sa'csi nani rujn si'c lo xtzuum Jesucrist, bejnga rchaglajz Dios, luxh reben guedxliuj rniiza didxsa'c xcuent sa' bejnga.

¹⁹ Ni'cni chanuutis guidiilnu recos nani rujn chu yälrbedxilajz, näjza nani rujn racnäjnu resa'nu te tioobruren loj xnezyuj Dios. ²⁰ Na'c guntu nit xtzuum Dios xcuent ni rajwtu. Guliicani guira'ti ni rajw bejñ najc naya, niluxh palga gautu te cos nani gun jiajb bejtzlu nen dojl, ni'c najc xhet laadi. ²¹ Hueen najc na'c gautu bääl, na'cza yätu bin, na'cza guntu jiajb sa'lu nen dojl. ²² Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. ²³ Luxh palga guntio'p lajz te bejñ xcuent nani rajwni, sigubeeni lagajc laani, sa'csi dini gau xcuent yälrililajz, sa'csi xhitis ni di gac xcuent yälrililajz, lagajc ni'c najc dojl.

15

Huinälajz sa'lu

¹ Nuurnu ni agusutijpnu lo yälrililajz nanab gacnäjnu resa'nu nani gajd chalilazsa'c. Di gacdi guibañtisnu xcuentcanu. ² Tejganu nanab

chonälaaznu resa'nu lo xcäl'nabansa'cni te gacnäjnu chalilajzrurenı. ³ Sa'csi nicla Jesucrist dini nibajñ xcuentcanı, luxh si'cni caj loj xtidx Dios: "Redidxyaj ni guniyajrenı lojlu biajbrenı yecä." ⁴ Guiraa rediidx ni cuaj lo guijtız galoolı, cuajrenı te guluiireni nuurnu te ga'pnu yälsutıjñ näjza yälrustıoblajz te gacza guibääznu lo xtidx Dios. ⁵ Dios rusutıjñ lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. ⁶ Te dxejcti tejtis gac xse'tu guiliä'ptu xpala'n Dios, Xtrad Jesucrist.

Gusule' xtidx Dios loj rebenzıjt

⁷ Ni'cni colca' resa'tu, renanı ahuililajz xtidx Dios sigajc cua' Jesucrist nuure te guiliä'pnu xpala'n Dios. ⁸ Sa'csi narä rniä lojtu, biääd Jesucrist te gujçni si'c te mos loj rexpen Israel te baluiini xcuent didxgulii xten Dios te gusojb rediidx nanı bia'n Dios loj retoxtadgoldoonu, ⁹ näjza par rebenzıjt, te guliä'prenı xpala'n Dios sa'csi baluilojni xcäl'rulaslajz Dios lojrenı, si'c ni caj lo xtidx Dios: Ni'cni siliä'pä xpala'nlu nez loj rebenzıjt, soläza dij lojlu.

¹⁰ Dxejcti stee lajt rniini:

La'tu benzıjt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzıjt, colguiliä'p xpala'n Dad, suguiliä'pza guiralii rebejn xpala'nni.

¹² Stee huält guniiza Isaías scree:

Siricaj te xagdoo toIsaí,

näjza te ni chäs te guinibeenı loj rebenzıjt,

laanı cabäjz rebenzıjt.

13 Naj rniabä lo Dios ni rudeed yärbäzljajz, te laani gacnäj guibalajztu, cuecdxilajztu, sa'csi salilajztu, te tioobru yärbäzljajz ni rajptu sa'csi Sprit Dxiän xten Dios yu' nen lastootu, luxh laani rajpni yälrnibee.

14 Luxh xcuent la'tu rebetzä, anancheä nabaṣa'ctu nasiṇduxhtu, arajcza ruliḍdxtu sa'tu, 15 luxh loj guijtzre bacuaä gaii didxnaj xcuent tiop-choṇ cos, te gusnaä lajztu. Runä si'c xcuent yälrulaslajz ni baniidx Dios loä 16 te gacä xpeṇ Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni beṇnaya sa'csi rbäjz Sprit Dxiän nen lastooreni.

17 Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. 18 Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxnä sa'csi biejn diajgreni xtiidxnä, bahuiizarenä rextzuunni, 19 con yälmilaagwr xten redzunro, resenro, ni gujc con xcälrnibee Sprit Dxiän xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. 20 Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. 21 Te gacni si'cni caj lo guijtz:

Renani rutliidi bij diidx xcuentni, suhuiipacreni lojni,

luxh renani gajdpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

²² Ni'cni balti huält badxojn Dios narä jiadhuiä lojtu. ²³ Luxh naj sa'csi abaluxä xtzunä guideb nezree, näjza sa'csi agujc balti ijz rlazduxhä jiadhuiä lojtu, ²⁴ naj che cha'a España siädhuiäpac lojtu. Che tedä, jiadhuiäpac contu te ganid guibal-aznää la'tu, dxejcti gacnäjtu narä te cha'a España. ²⁵ Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. ²⁶ Sa'csi rebejn Macedonia näjza reben Acaya rlazpacreni guxhalreni te coobr loj rebenprob ni yu' lo reni huililajz xtidx Dios nen guedx Jerusalén. ²⁷ Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. ²⁸ Ni'cni che chasa'nä meel lojreni dxejc tedä lajdxtu, jiadhuiä contu, dxejc cha'ä España. ²⁹ Luxh ananä che jiälä lojtu, li guidxa lastoä xcäl_{ni}asa'c xtidx Jesucrist guidzunä lojtu.

³⁰ Rebetzä, rniabduxhä lojtu xcuent xtidx Dad Jesucrist näjza xcuent xcäl_{rinä}lajz Sprit D_{xan} xten Dios, col_{guidxagsa}'tu, te col_{gacnä}j col_{cuedx}-guiniabtu lo Dios xcuentä. ³¹ Col_{nab} lo Dios te gus_{laani} narä loj reben Judea nani di gusoob xtiidxni te saru gun reben_{xan} ni yu' Jerusalén te xca'reni ni chanää lojreni. ³² Te cabaa lazä guidzunä lojtu, sa'csi rlazpac Dios jiälä lojtu, te la_{ni} yu'ä lojtu siälyuä,

susilazäza con la'tu. ³³ Dios ni rbecdxilajz bejn gacnäj guiraatu. Sugacni si'c.

16

Ruxhaläni xtixtios lojreni

¹ Colgacnäj bisiajnnu Febe. Nane're bejn dzunduxh neñ guidoo ni tre' Cencrea. ² Colca'ni xcuent Dad, Jesucrist, si'cni riäjl gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduhxni xhidal rebejn, nägajcza narä gucnäjni.

³ Ruxhalä xtixtios lo Priscila näjza lo Aquila, ni racnäj narä lo xtzuun Jesucrist. ⁴ Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. ⁵ Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazduhxä, ni gujc benganid ni huililajz xtidx Jesucrist neñ guedx Acaya. ⁶ Ruxhalä xtixtios lo Marii nani benduxh dzuun lojtu. ⁷ Ruxhalä xtixtios loj reben ladxä ni laa Andrónico näjza Junias; laareni gyunäj narä neñ latzguuib, najcreni beñro loj reapost. Ganid laareni huililajz xtidx Jesucrist, dxejcti huililazä.

⁸ Ruxhalä xtixtios loj Amplias, ni sanälazä xcuent Jesucrist. ⁹ Ruxhalä xtixtios loj Urbano, ni runnäj nuurnu xtzuun Jesucrist. Ruxhaläza xtixtios loj Estaquis, ni sanälazä. ¹⁰ Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo. ¹¹ Ruxhaläza xtixtios lo Herodiön ben ladxä, näjza loj resa' Narciso nani ahuililajz xtidx

Jesucrist. ¹² Ruxhaläza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. ¹³ Ruxhaläza xtixtios lo Rufo nani agule Dios, näjza lo xnanni, sa'csi gujçni si'c xnanäza. ¹⁴ Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵ Ruxhaläza xtixtios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpen Dios nani yunäjreni ro'c.

¹⁶ Colye'tz xchan loj resa'tu. Guiraa rexquidoo Jesucrist ruxhal xtixtios lojtu.

¹⁷ Rebetzä, rniabduxhä lojtu ga'ptu cuidaad xcuent renani rujn biey te guilia' sa' bejn, nani rlanj guntu guiraløj nani najc garenca loj yäl_rului ni bisieedu, colguibicaj lojreni, ¹⁸ sa'csi sa' rebejnğa direni gun xtzuum Jesucrist. Laareni rlanjtisreni gunreni si'c rlanj tiejxhreni; rniireni didxdoo, didx ni rgudxguel diajg bejn te rusgueereni lastoo rebejn nani di susin. ¹⁹ Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasin_duxh xcuent recoshueen, luxh si'c báz xhet ganditu xcuent recosguijdx. ²⁰ Luxh Dios nani ruscuecdxilajz bejn siojb guta'cwni ben_dxab xhan ni'tu. Gacnäj Dad Jesucrist la'tu.

²¹ Timoteu nani racnäj narä lo dzuun, ruxhal xtixtios lojtu. Lucio, Jasón, näjza Sosípater, ben_ladxä, ruxhalza xtixtios lojtu.

²² Najrä Tercio, ni cagucuaä guiitzre xcuent Pabl, ruxhaläza xtixtios lojtu xcuent Jesucrist.

²³ Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' reben guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacnäj Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rexhigab ni naga'tz galooli, ²⁶ naj abaluiloj rediidxga lojtu; näjza xcuent ni bacuaa reprofet galooli; si'c najc diidx ni bia'n Gueb Dios ni nabajn par tejpas loj rexpejni, agusule'ni loj guiraa reben guedxliuj, te gusoobreni diidx sa'csi rililajzreni xtiidxni, ²⁷ colguiliä'p xpala'n ni najc tejtis Dios ni nanduxh. Suguiä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

5cff1274-8dc3-5398-a94d-f6033bb363c9